

Numbers Au Mutulua

Pariverena

Wei bukana wavana *Numbers*, aubaina au kapita 1 da kapita 4 e ririweta da Israel ana dam 12 ma ai dam nelara biaġa sorodia. Wei bukana nanare Mai Israel ai mae au mutulua madeġa 38 i kwa, ma aiwai i kaukauei bo ai babara au Sinai i vikarei da i nae au Canaan lamna e bababaniei.

6

Aaron natunatuna maiteni ai Viaiaina

²² BADA Moses i riwei i pa, ²³ “Aaron ma natunatuna ma riwei da wenanare mai Israel ina viaiaini ina pa,

²⁴ ‘BADA ina viaiainimi
ma ina gagaloemi.

²⁵ BADA ivina ina ai awarimi
ma ina paina-kauemi.

²⁶ BADA ana nuaiaina ina mae-tavirei awarimi
ma nuauba ina veremi.’

²⁷ Ma nanarena, maranai Aaron ma natunatuna Tau wavauei mai Israel e viviaiaiini, ma Tau ana viaiaiini.”

13

Taurauivu Canaan i tuvirevirei

¹ BADA Moses i riwei i pa, ² “Mai Israel ai dam 12 au orai rewapana tagotagogi ava ma vinei, da ma paritawanei da Canaan dobuna ina ivui, wei dobuna mai Israel a vereverei.”

³ Ma BADA i ririweia nanare Moses i kauēi. Mai Israel ai dam 12 babadai i paritawanei. Tauī ai ġaravu au mutulua Paran i voterei da i nae au Canaan.

¹⁷ Maranai Moses ravai i paritawanei da dobuna ita ivui ma i riwei i pa, “Au Negev ona virautua da dobu violaolana ona naeni da au navanava ġelauna. ¹⁸ Dobu ona tuvirevirei, ma ana patara ona inanai menanare, rava ai maġa ma ai rewapana bo ai ġokokokara? ¹⁹ Doa maumaurana bo eġa? Ai melaġai ona tuvirevirei, garigarina bo e mamae lota? ²⁰ Doa maumaurana bo eġa? Ai e gogogo bo eġa? Ma ona kauana-guratei da ai anoi ġelaui ona purai da ona neiai.”

²¹ Anina ma tauī dobuna i naeni, au mutulua Zin* i vikarei ma dobuna i naeni da au ġia dewadewana au Rehob, wei lamna Lebo Hamath au ġereġerena.

Taurauivu i nememei

²⁵ Au pom 40 taurauivu dobu i tuvirevirei ma i nememei, ²⁶⁻²⁷ I nei Moses, Aaron ma Israel patarai awari au Paran mutuluana au Kadesh ma ai anoi au dobuna i vaivaia i viatataiei. Ma i parivere i pa, “U paritawanelai da dobuna a ivui, marina grape ana ġou marana ma a inanai da ani ipi gabuna aiaina ma doa maumaurana, ma aina anoi ġelaui a neiai da ona inanai. ²⁸ Wate kampa rava ġaiġaiawai e mamae, ma ai melagai i rata kaua

* **13:21:** Wei lamna dobu ġaeġaena Negev au paratana i vikarei da i nae da ola Hermon au ġereġerena ma Hamath melagaina.

ma i gari-kwaviviroi da eġa ġavia ina rui. Ma kampa mai Anak a inanai. ²⁹ Mai Amalek au mutulua Negev e mamae, ma mai Hitti mai Jebus ma mai Amori au ola e mamae ma mai Canaan au gera, Jordan wairana au ririvana e mamae.”

³⁰ Ma Caleb, rava i riwei da i genuana ma i riwa i pa, “Tana nae dobuna ravai tana virubai ma dobuna tana vaia!”

³¹ Wate taurauivu maiteni i ġeġae i pa, “Eġa! Ravai i virewapana kaua eġa me tauta. Eġa tana viġaviei.” ³² Ma nanare tau i nai dobuna ana apoapoe riwana i vibabarai mai Israel awari i pa, “Nai eġa ani ipi doana aiaina ma rava manamanai ma ġaiġaiawai kampa e mamae. ³³ Ma kampa rava ġaiġaiawai Mai Nephili† a inanai (Mai Anak noinoii) tauai a inana-meleiai lamna me kapau ma nanare tau i au matai lamna tauai me kapau.”

14

Mai Israel Moses ma Aaron i viġaviei

¹ Ma nai waguvaraina rava anatapui i tou mara. ² Tau i anatapui Moses ma Aaron i viġaviei i pa, “Airake au Egypt ata iraġe ota! Bo weka au mutulua. ³ Aiwai aubaina BADA e nainaieta wei au dobuna da ravai sodei ina viraġenita ma awawata ma natunatuta ina pani-naiei. I ai kaua da tata wanaviraita au Egypt.” ⁴ Ma tau i babani vivira i pa, “Bada tana vinei da ina naiana-meleta au Egypt.”

† **13:33:** Mai Nephili eġa tata aramana-kauei, wate tau i rava gogogobui. Gen 6:4 e ririweta da tau i meiei i nei.

⁵ Anina ma Moses ma Aaron i mae-ġaira da naoi au doa Israel patarana au matai. ⁶ Nun natuna Joshua ma Jephune natuna Caleb ruaġai, tau i maiteni dobu i tuvirevirei, ai gara i sikai, ⁷ ma mai Israel anatapui i riwei, “Dobuna anatapunana a naeni ma a tuvirevirei ma dobu maumaurana. ⁸ Mepa da BADA nuanuana ina ai awarita ma ina ruieta dobuna maumaurana awarina, weka sia ma lam eġa anibaiana. ⁹ Wate BADA eġa ona viġaviei. Ma ravai dobuna e maemaeni eġa ona rovoei, tana viaġaġana-opunei. Tau i ai agu eġa. Tauta BADA maiteni ta mamae! Ravai eġa ona rovoei!”

¹⁰ Mai Israel Caleb ma Joshua ġaime i ita viraġeni wate BADA ana borumana i eġa numagara au tepana.

God Moses i riwei da ita wanavirai ma ana rava ita taravaina-naiei au mutulua da etanai e nenaie au Boga lebalebarina ita naeni.

God i riwa da rava ina kovoġi

²⁶ BADA Moses ma Aaron i riwei, ²⁷ “Wei ravai apoapoe ai beura awariu a nonora, iauei! Mai Israel ai pariviravira awariu a nonori.”

²⁸ Wenanare ma paribelei, “BADA i riwa, “Tau wavauei a ririwa da aiwai o vivibaġei, nanare ana kauei.” ²⁹ Taumi au mutulua tupuami urabovai ina nae. O pari-virevireu aubaina taumi ami madeġa

²⁰ ma e ġeġae ona iraġe. ³⁰ A parivainuaġami da wei au dobuna ota mae wate eġa aiai tagogi wei au dobuna ina rui anina Jephune natuna Caleb ma Nun natuna Joshua.

³¹ Ma o ririwa da natunatum i ina vaia ai panipani, wate tau i kampa ana ruiei da dobuna

o gedugeduaieia ina maeni. ³² Wate taumi patarami tupuami au mutulua ina bova-nae. ³³ ✨Eġa ota vipatutu ma lamna aubaina natunatumi ina vinuapoapoe au mutulua ma ina kovoġi da ina viġamoġamo-nae da madeġa 40 ina kwa nai maranaina taumi kimta magurimi ona iraġe-pai. ³⁴ Aupom 40 dobuna o tuvirevirei lamna aubaina ana kovoġimi da madeġa 40, au pom tagogi maiana madeġa tagogi. Ami ġo'apoapoei aubai au kovoġa malana ona vaia. ³⁵ TAU BADA, A riwa! Tau wei ana kauei taumi ġo'apoapoe ravami anatapumi awarimi. Ami rava maiteni o vitagogiemi ma o viġavieu. Taumi anatapumi au mutulua ona kwa, taumi weka ona iraġe.

20

Miriam i 'raġe

¹ Nawaravi au vouna mai Israel anatapui au mutulua Zin i ġeta ma au Kadesh i rauġaravu. Weka Miriam i 'raġe da i doboi.

Mai Israel Moses maiteni i viparipariniġai

² ✨Kampa Waira eġa ma lamna aubaina tauti i vitagogiei ma Moses ma Aaron ai ġavia i vomairi, ³ ma Moses maiteni i viparipariniġai i pa, "Rorova varevareiai maiteni ata iraġe tagogi BADA au matana!" ⁴ Aiwai aubaina BADA ana rava u neiai au mutulua ana ġamoġamoi da ina iraġe ⁵ Aiwai aubaina Egyptei u tere-opunelai ma u neiai wei dobuna apoapoena awarina? Weka eġa ani ipi doana aiaina da witi da damala aina bo grape

✨ 14:33: Act 7:36 ✨ 20:2: Exo 17:1-7

warami bo *Pomegranates* aina ina gogo, ma eġa waira aniuma!

⁶ Moses ma Aaron, patara i voterei ma i nae BADA ana numagara au metaetana ma i mae-peu au doa ma i raudune. Ma BADA ana borumana i eġa. ⁷ Ma BADA Moses i riwei, ⁸ “Am jġona ma vaia ma tuam Aaron maiteni rava ona vitagogiei. Ma au matai kira awarina ma babani ma ana waira ina veremi. Nanare waira kirei ina opu da Israel patarana ina uma ai ġamoġamo maiteni. ⁹ Anina ma Moses jġona BADA au naona i vaia, i ririwei nanare.”

Moses kira i ravi

¹⁰ Ma Moses ma Aaron dam Israel i vitagogiei kira au naona ma Moses i riwa, “Ora potapotami! Ona genuana! Tauai waira kira au orana ana tere-opuniai aubaimi!”

¹¹ Ma Moses ana jġona i voepai ma kira i ravi mara ruaġa. Ma waira ġaeġaena i ruba-opu da rava ma ġamoġamo i uma.

¹² Anina ma BADA, Moses ma Aaron i riwei, “Taumi eġa ota vitumaġana-kau eu da Tau vivivireu ami dam Israel au matai, ma lamna aubaina taumi eġa wei ravai ona ruiei dobuna a vereveremiana awarina.”

Aaron i 'raġe

²³ Au ola Hor, Edom ana au parata, kampa BADA Moses ma Aaron i riwei, ²⁴ “Taumi riwau o rauaġaiġaiei au Meribah ma lamna aubaina, dobu mai Israel a verevereia, Aaron kampa eġa ina rui. Tauna noinoina ina votaġoi. ²⁵ Aaron ma natuna Eleasar ma taravaia ma ma ġaei au ola Hor. ²⁶ Kampa Aaron ana pirisi garana ma votawanei

ma natuna Eleasar ma vioteni. Aaron kampa ina iraḡe ma noinoina ina votaḡoi.”

²⁷ Moses BADA i ririwei i kauei. Tauī ola i ḡaeni, mai Israel anatapui au matai. ²⁸ Moses Aaron ana piriṣi garai i votawanei ma natuna Eleasar i vioteni. Ma kampa ola au tepana Aaron i 'raḡe. Ma Moses ma Eleasar i ḡaira memei.

²⁹ Maranai patarana i aramanei da Aaron i 'raḡe ma i touei da au pom 30.

21

Mota bronzei i kauei

⁴ Tauī ola Hor i netawanei ma boga lebalebarena etanaina i vaia da Edom ita vorei. Au etanai rava amloi i ḡaiḡai aubaina ai vaḡai i manawa, ⁵ ma Moses ma God i eni i pa, “Aiwai aubaina Egyptei o taravaina-opunelai da au mutulua ana iraḡe? Ai lam eḡa! Ai waira eḡa! Ma wei lam tagogina manna a amgeduaiei.”

⁶ Ma BADA mota ḡaiḡaiawai i paritawanei awari ma maḡamaḡau i ani ma i 'raḡe. ⁷ Rava i nei Moses awarina ma i riwa, “Tauai ḡo'apoapoenā a kauei maranai BADA ma tam a parivireviremi. Ma raupari da BADA mota ina vaitawanei.” Ma Moses i raupari rava aubaii.

⁸ Ma BADA Moses i riwei i pa, “Mota ḡaiḡaiawana kokoitauna ma kauei ma ai au damona ma raḡini. Maranai mota, rava aiai i ani ma i taepai da mota kokoitauna i 'nanai, ma tauna ina lawana.” ⁹ ✧ Ma Moses mota bronzei i kauei ma ai au damona

✧ 21:9: 2Ki 18:4

i raḡini. Maranai mota aiai i ani ma ravana i taepai da mota i 'nanai ma i lawana!

Au Ola Hor da i nae au Moab

¹⁰ Mai Israel i nae ma au Oboth i rauḡaravu. ¹¹ Ma Oboth i netawanei ma i nae au Iye-Abarim i mae, wei lamna mutulua, Moab au naona au maramatanei. ¹² Kampa da i nae Zered au wapuna i rauḡaravu. ¹³ Ma wei dobuna i netawanei ma i nae waira Arnon au baba ḡelauna au mutulua mai Amori ai au parata. (Moab ma Amori ai dobu au poui wei wairana e viviparata).

Mai Israel, gulau Sihon i vovaiubai

²¹ Ma mai Israel taupariverena i paritawanei da Sihon mai Amori ai gulau i pariverei i pa, ²² “Tauai a ḡoei da am au dobu ata verautua. Tauai eḡa ana deḡa ami au wapu bo grape wapuna, bo ami au waira dogona waira ana umai. Tauai gulau ana au etanai ava ana babara da am dobu paratana ana opu-tawanei.”

²³ Wate gulau Sihon mai Israel eḡa ita vianinei da ana au dobu ita verautua. Ma ana sorodia anatapui i tami ma i nae au mutulua da Israel ita nebelei. Au Jahas i ḡeta da Israel maiteni i viḡaiḡaiawa. ²⁴ Wate mai Israel i virewapana ma gulau Sihon i viubai ma ai dobu waira Arnon i ḡae da waira Jabok ana parata i vaia, wei kampa mai Ammon au dobu e viviparata. Mai Ammon ai parata i gagaloana-kauei ma lamna aubaina mai Israel eḡa ai au dobuna ita rui. ²⁵ Ma mai Israel i viḡavia da, mai Amori ai melagai i vaipai da i maeni, taon Heshbon ma melagai ḡelau kampa maiteni i vaia.

Mai Israel gulau Og i vovaiubai

³¹ Nanare mai Israel mai Amori ai dobu i vaia ma kampa i mae ³² Ma Moses tauivu i paritawanei da Jaser taon i tuvirevirei, ma muriai mai Israel i nae ma ai melaḡai anapui i vaia ma mai Amori kampa maemaēi i viaḡaḡana-opunei. ³³ Ma mai Israel i vira ma etanaiei i ḡae au Bashanei. Ma Bashan ai gulau Og ai sorodia anapui maiteni i opui da tau i nebelei au Edrei. ³⁴ Ma BADA Moses i riwei i pa, “Eḡa tauna ma rovoei, aubaina tauna, ana rava anapui, ma ai dobu maiteni au uram a tereterei. Aiwai u kauei Amori ai gulau Sihon awarina, au Heshbon taon, nanare gulau Og awarina ma kauei.” ³⁵ Ma gulau Og i viraḡeni natunatuna nelarai ma rava anapui i viraḡena-pai, eḡa aiai ita mae. Ma mai Israel dobuna i vaia da ai dobu.

22

Balaam Israel ḡaḡalana i geduaiei

¹ Ma mai Israel i vomairi da Moab au wapuna, Waira Jordan au adana i rauḡaravu, ma au baba ḡelauna Jeriko taon. ² Ma mai Israel aiwai i kauei mai Amori awari, Zippor natuna Balak anatapuna i nana-pai. ³ Mai Israel i maḡa kua ma lamna aubaina mai Moab i rovo kaukua, rovo ita iraḡelei. ⁴ Ma mai Moab mai Midian babadai i riwei i pa, “Aburuna ava ma wei patarana aiwai anatapuna au ririvata ina pupuna-pai, me bu-lumakau au wapu modu e amam.”

⁵ Anina ma Moab ai gulau Balak, Beor natuna Balaam ana riwa i paritawanei au Pethor, waira

gāeḡaena wavana Euphrates au ririvana. Ana riwa wenanare, “Dam tagogi Egyptei i opu, ma dobu anapuna e vaivaia ma marina au ririvau i rauḡaravu. ⁶ Tau i virewapana kaua eḡa me tau, ma nei ma ravai ma parivai-iviapoapoeni, mepa da tau ravai ana vovaiubai ma wei dobunei ana viaḡaḡana-opunei. Aramanei da maranai tam rava e viviaiaini tauna viaiaina e vaivaia ma maranai u parivai-apoapoeni tauna ina apoapoe.” ⁷ Ma Midian ma Moab babadai mane i vaia Balaam vimaiana aubaina ma i vomairi. Ma i ḡeta Balaam awarina ma Balak ana riwa i parivere. ⁸ Balaam ravai i paribelei i pa, “Weka ona matave ma au maratoma BADA aiwai ina riweu ana pariveremi.” Ma babadai kampa Balaam maiteni i mae. ⁹ God i nei ma Balaam i vitara-virevirei i pa, “Aiavo i nei awarim?”

¹⁰ Balaam i paribelei, “Zippor natuna Balak, Moab ai gulau wei riwana i paritawaneiai i pa, ¹¹ ‘Ma rautaniḡana dam gāeḡaena Egyptei i opui ma dobu anapuna e vivioai. Ma nei ma aubaiu ravai ma ḡaḡalei, da maiteni ana viḡaiḡaiawa ma ana viagei da ina vinelana.”

¹² Wate God Balaam i riwei i pa, “Eḡa maiteni ma nae. Eḡa wei ravai ma ḡaḡalei aubaina Tau au viaiaina awarii.”

¹³ Ubaubanai Balaam i nae ma Balak ana tau-pariverena i riwei, “Ona nae me ami au melaḡai! BADA eḡa ita vianineu da maitemi tana nae.”

¹⁴ Ma Moab babadai i nae me ai bada Balak awarina ma i riwei i pa, “Balaam eḡa ita goei da ita nei.”

Anina ma Balak babada gāeḡaei i paritawanei Balaam awarina. Ma i riwei da pulo gāeḡaena ita verei

mepa da tauna ita nei da mai Israel ita ġaġalei. Ma marina God Balaam i riwei da babadai maiteni ita nae Balak awarina ma God aiwai i riwei lamna ava ita kauei.

²¹ Ma ubaubanai Balaam i vomairi ana donki i vokaukauei ma Moab babadai maiteni i nae. ²² Wate God amlona i ġaiġai kua da Balaam i nena, ma ana anela i paritawanei da ana etanai i mae-tomeni. Balaam donki i gerui ma ana taunola ruaġa maiteni i nena. ²³ Ma maranai donki BADA ana anela i 'nanai ana sodna au etanai i maimairi ma i tawana-ruiei au ririva. Balaam donki i kwakwapui da ita opu me au etanai.

²⁴ Ma BADA ana anela etanai ġuriġuririna i mae-potai, Grape ġoroġorovai epaepana ruaġa ġaime i garigaria au poui. ²⁵ Maranai donki BADA ana anela i 'nanai ma ita deġa lamna Balaam aena au gari i viairaturatui. Ma Balaam donki i kwapu-melei. ²⁶ Ma BADA ana anela i nae ma etanai au ġuriġuririna i mairi, weka eġa gabu ita mamae-dadana da tau i ita deġa. ²⁷ Maranai donki anela i 'nanai, i mae-ġaira da i kiala, Balaam amlona i ġaiġai kua ma ana jiġonei donki i kwapui.

²⁸ Anina ma BADA donki gamona i votawanei da i babani i pa, "Aiwai apoapoena a kauei awarim da mara tonuġa u kwapuii?"

²⁹ Balaam donki i riwei i pa, "Tam u vikalokaloeru me bua! Awariu sod lamna marina ata viraġenim."

³⁰ Ma donki Balaam i riwei i pa, "Tau donkina tagogina marana patapatai u gerugeruii bo? Wenanare a kauana dadanei awarim bo eġa?"

Balaam i riwa, "Eġa!"

³¹ Ma BADA Balaam matana i vikalai da ana anela i 'nanai ana sodna i maimairi au etanai. Ma i mae-gaira au doa ma i raudune.

³² Ma BADA ana anela i riwa i pa, "Aiwai aubaina am donki mara tonuġa u ravi? Ma nonori am vaġai lamna eġa aiaina, Tau a nei da ata viġaem.

³³ —Mara tonuġa am donki i 'nanaiu ma mara tonuġai i deġeu. Mepa da eġa, lamna tau ata viragenim ma donki ata voterei."

³⁴ Ma Balaam BADA ana anela i riwei i pa, "A kauana-boai. Eġa ata aramanei da tam au etanai u maimairi da uta viġaeiu. Marina mepa da u notai da eġa ita ai au matam, tau ana nae me."

³⁵ BADA ana anela i riwa i pa, "Ravai maiteni ma nae, wate aiwai ana riwem lamna ava ma latoni." Anina ma Balaam, Balak ana babadai maiteni i nae.

23

Mara tonuġa Balak pulo i apui Balaam ana god awarina da mai Israel ita ġaġalei. Wate marana patapatai Balaam eġa mai Israel ita ġaġalei. Ma God aiaina ita kauei mai Israel awarii lamna ava i babaniei. Balaam mara 4 God ana babani mai Israel awarii i babaniei. Wei lamna ana babani viru-aina.

¹⁸ Ma Balaam wei riwana i riwei i pa, "Balak, Zippor natuna ma vomairi;

ma Ma rautaniġana kaua.

¹⁹ God eġa rava ota, Tauna eġa ita morumoru.

Bo ana nota ita viravirai.

Tauna aiwai i babaniei,
nanare ina tupua

Aiwai i parivainuaḡani;
nanare ina kauēi.

20 I riweu da wei ravai ana viaiaini;
maranai God e viaiaina, tau eḡa tagotagogina
da ana virai.

21 BADA ai God
taui maiteni e mamae, ma taui e vovoepaepai da
Tauna ai gulau.

Tauna eḡa nuabola bo apoapoe ita neineiāi Jacob
ḡoḡoḡana - mai Israel awari.

22 God taui Egyptei i tere-opunei,
Aubai i viḡavia me bulumakau moduei.

23 Eḡa aiai Israel ina ḡaḡalei,
bo ina baravui.

Marina rava ina riwa,
'Ona inanai God aiwai i kauēi mai Israel aubai.'

24 Mai Israel lamna me Lion vivirewapanana.
E vovomairi da ana ḡavia e viviraḡeni
ma tarana e umaumai,

Anina ma ina rauvirai da ina matave."

24

*Anina ma Balaam mara vi-four-na God riwana
i babaniei, i pa:*

17 "God i viatataieu da rava muriai e nenei,
a inanai wate eḡa laḡilaḡina ita nenei,

Jacob ana damei gulau ana jiḡona

Ana borumana me ubona gamrina Israelie
e opuopu.

Moab muruai ma Seth natunatuna
anatapui kolai ina viaigwadagwadai.

18 Ana ḡavia Edom ina vovaiubai
ma ai dobu ina vaia,

ma mai Israel ina virewapana guratana.
 19 Gulau, Jacob ana damei ina nei
 ma mai Moab mae-tereterei ai au melagai
 ina pupuni.”

25

Mai Israel, Baal i raudunelei

¹ Maranai mai Israel au Shittim i mamae, nelara i vikarei da Moab waivinei i viawawanei. ² Wei waivine, nelara i riwei da i nei da ai god awarii puloi i apuapui.* Ma anapui i am gogona ma ai godna i raudunelei. ³ Wei kauanei mai Israel Baal-Peor i voepaepai ma lamnei BADA ana meji i vikalai.

⁴ BADA Moses i riwei i pa, “Babadai anapui ona vaia ma madegai BADA au matana ona viraḡena-naiei, da tau au meji awarimi ina dauva.”

⁵ Ma Moses Israel babadai i riwei i pa, “Taumi tagotagogi ava ami au dam anapui da Baal-Peor i raudunelei ona viraḡeni.”

⁶ Moses ma Israel patarana BADA ana numa gara au metaeta i toutou, ma au matai oroto Israeliei wavine Midianei i taravaina-ruiei ana au numa gara. ⁷ Maranai Aaron ḡoḡana pirisi wavana Phineas wei kauana i ’nananai, boru i voterei ma pawasi i lavui, ⁸ ma Israel iei i votaḡoi da ana au numa gara ma pawasiei uporana i tonai da wavine

* **25:2:** Wei kauai lamna god ḡelauna i raudunelei, ma lamnei Moab waivinei ai vitumaḡana nanare i eraerawa. Maranai Israel nelarai wei waivinei maiteni i viiawawana, tau ai god Baal i raudunelei ma i vovoagui da ai dobu ita viaiaini da ita maura.

au uporana i opu-vivira. Ma dorianā apoapoena au Israel i kwa. ⁹ Wate wei gimna rava 24,000 i viraḡeni.

¹⁰ BADA Moses i riwei i pa, ¹¹ “Aaron ḡoḡana pirisi Phineas au meji mai Israel awari i viubai; da tau i eḡa ata pupuni aubaina tauna ana nota me tau au nota, rava eḡa god ḡelau i ina voepaepaei anina Tau ava. ¹² Lamna aubaina tauna ma riwei da maiteni parivainuaḡana bagibagina ana kauei da ata ruaḡa tana viturana vivira. ¹³ Tau aubai i ina vipirisi nonoa.”

27

God Joshua i vinei

¹⁸ ☆ Muriai BADA Moses i riwei i pa, “Aruau Nun natuna - Joshua awarina, lamna aubaina ma taravaini ma uram au tepana ma terei da ma vovivirei au nola aubaina. ¹⁹ Ma naei Pirisi Eleasar awarina, Israel patarana anatapai au matai ma ma viaiaini da ina raviepaiem. ²⁰ Ma vovai-virewapani da Israel patarana tauna ina rautaniḡanei. ²¹ Tauna Pirisi Eleasar maiteni ina nola da ḡaima e ḡoreḡorei *urim*, * awarinei au nota ina vaivaia. Wei taunei Eleasar, ma Joshua ina agui Israel ai au lawana.”

²² Ma BADA aiwai i ririwei, Moses nanare i kauei. Joshua i taravaini ma Pirisi Eleasar ma Israel

☆ **27:18:** Exo 24:13 * **27:21:** Urim lamna ḡaima aburuna. Ma nai ḡaemana pirisi e viviatataiei da God ana nota i ririweta. Tauta ega tata aramanei 29-30 Exodus ma inana i.

patarana au naoi i vimairini. ²³ Ma urana au tepana i terei ma i vinei da ana raviepaia.

33

God mai Israel i egari da Canaan ina vaia

⁵⁰ Mai Israel Moab au wapuna, waira Jordan au ririvana i mamae ma, mai Jeriko au baba gelauna. Ma BADA Moses i riwei, ⁵¹ “Wei riwai mai Israel ma riwei, ‘Maranai Jordan o damani da au Canaan, ⁵² Dobuna taumaenina anatapui ona viaḡaḡana-opunei. Ai gana da ai kokoitau anatapui ona rika-viamoamoai. ⁵³ Dobu a veremi ona vaia, ḡariemi da ona maeni. ⁵⁴ Doa ona ḡutai dam damai awarii, au ḡaima ina viatataiemi nanare. Doa vounaina dam vounaina ona verei ma dam voaburuna nanare ana ḡuta voaburuna. Wate ḡaimi ana pariveremi metauna damna, metauna doana ina vaia. Dam anatapui doa ina vaia.

⁵⁵ —‘Wate mepa da nai dobuna taumaenina eḡa ona viaḡaḡana-opunei ma o vianinei da ina mae, tau lamna me vunavuna au matami bo donadona au ririvami maemaena, ma wei vita ḡaeḡaena ina veremi wei au doana. ⁵⁶ Mepa da ravai eḡa ona viaḡaḡana-opunei. Lamna taumi ana pupunimi me a viogei da tau ana pupuni.”

35

Anigagalo melagii

⁹ Ma BADA Moses i riwei i pa, ¹⁰ “Mai Israel ma riwei, ‘Maranai Waira Jordan o damani da au

Canaan o rui, ¹¹ melagai ḡelauī ona vinei da rava ai aniḡaḡalo. Maranai rava turana i vunu-boai da i 'raḡe, tauī weka ina ruba da ina gagaloei.
¹² Ona riwei, 'Weka ma mae da raubiwa ravai eḡa ina vodadanim ma rauetara ma paini."

Wedau Mark
The Gospel of Mark in the Wedau Language of Papua
New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 22 Feb 2024 from source files dated 31 Aug 2023

aa19f3e3-98fb-51fa-9c53-3906edc75f11